

## Ruski radikal Ilija Gorjačev uhapšen u Srbiji Ravnogorci u Banjoj Luci skrivali koljača i

16/05/2013 17:44 by Administrator

Pripadnik ruske ultradesničarske organizacije Ilija Gorjačev (30), koji je uhapšen 9. maja u Beogradu po potjernici Rusije, bit će izručen Moskvi, a Srbija je već pokrenula postupak ekstradicije. No, prema nezvaničnim saznanjima, Gorjačev je boravio i u Bosni i Hercegovini, odnosno Banjoj Luci, gdje su ga, dok se skrivao od ruskih vlasti, ugostili pripadnici Ravnogorskog etničkog pokreta!

Gorjačeva, vođu paramilitantnog pokreta "Vojna organizacija ruskih nacionalista" (BORN), ruske vlasti terete za umiješanost u 11 ubistava na rasno-etničkoj osnovi, među kojima je i odsijecanje glave jednom Tadžikistancu u oktobru prošle godine, kao i za banditizam i nelegalnu trgovinu oružjem.

### Bila potjernica

Prema informacijama koje su se jučer pojavile u nekim srbijanskim medijima, Gorjačev je uhapšen u trenutku kada je autobusom doputovao iz Banje Luke u Beograd, gdje se trebao sastati s još nekim pripadnicima pokreta na čijem je čelu. Međutim, u Ministarstvu unutrašnjih poslova RS nisu mogli potvrditi ovu informaciju. Načelnik Uprave kriminalističke policije MUP-a RS Zoran Mandić u kratkom telefonskom razgovoru poručio je da prvi put uje za takvu informaciju te da uhapšeni nije bio predmet njihove istrage. - U ovom trenutku nemam nikakve informacije o eventualnom boravku uhapšenoga u RS - kazao je Mandić za "Avaz".

Prije nego što su ruske vlasti za njim raspisale potjernicu, Gorjačev je vodio pokret "Ruski obrazac" i bio je gost u Beogradu, gdje je čak kao gost srpskih radikala prisustvovao sjednici Skupštine Srbije, a u ljeto 2011. je dao i intervju za jedan ruski portal s tadašnjim ministrom vanjskih poslova Srbije Vukom Jeremićem!

### Veliko okupljanje

Kako "Avaz" saznaje, pripadnici "Ruskog obraza" boravili su jednom prilikom i u Banjoj Luci, gdje su prisustvovali "Svesrpskom saboru na Manjača", koji organizira Ravnogorski pokret iz RS.

- Prošle godine u ljeto okupio se veliki broj ravnogoraca iz RS, Srbije, Crne Gore i emigracije, odnosno svih krajeva gdje Srbi žive, a bilo je i gostiju iz Rusije. Međutim, nemoguće je zapamtiti sve po imenu ili liku, jer je bilo nekoliko stotina ljudi - ispričao nam je jedan od pripadnika Ravnogorskog pokreta iz RS.

Mediji u Srbiji prenose, pozivajući se na izvore iz istrage, da se Gorjačev jedno vrijeme krio i na Kosovu i kretao se na području Balkana uz pomoć falsificiranih dokumenata i činjenice da odlično govori srpski jezik. Kako su potvrdili iz Ministarstva pravde Srbije, proces njegove ekstradicije je u toku, a Rusiji će biti izručen u narednih 18 dana, čim srpska strana dobije odgovarajuće dokumente od ruskih vlasti.

### Uhapšen i "saborac"

Ruski istražni komitet, koji je pripremao akciju u saradnji sa srbijanskom Bezbjednosno-informativnom agencijom (BIA) i beogradskim uredom Interpola, objavio je da je istovremeno u Ukrajini uhapšen njegov saborac Mihail Volkov. Među ubistvima u Rusiji u posljednje četiri godine koja se pripisuju ovoj grupi su i ubistva advokata, novinarka, sudije, antifacističkog aktiviste, tajlandskog prvaka u boksu i ubistvo nekoliko nepravoslavnih stanovnika Rusije.

Izvor vijesti: Dnevni Avaz

---